



4. oktoberi 2016

UKA2016/58

Aalajangiiffigisassatut siunnersuut, Naalakkersuisut misissuinissamut suliakkerneqarnissaat, saqqummiutissallugu innuttaasut aningaasaataannut qanoq sunniuteqartigissanersoq suliaritittussat utaqqisarnerisa annikilliseriaqqinnissaanut suliniut. Misissuineq paasissutissiisaaq suut periarfissaanersut utaqqisut ikilisinnissaannut aammalu aningaasartuutissat suussanersut. Misissuineq siunnersuutinik imaqassaaq.

(Inatsisartunut ilaasortaq Justus Hansen, Demokraatit)

Inatsisartunut ilaasortaq Justus Hansen Demokraatit aalajangiiffigisassamik siunnersuuteqarluni tassalu napparsimallutik suliaritittussat utaqqisarnerup annikilliseriarnissaanut suliniuteqartoqarnissaanik saqqummiussaqaarluni tamanna oqaaseqarfigissavarput.

Peqqinnissaqarfiup innuttaasut napparsimasut sapinngisamik piaartumik katsorsarneqarlutik ikiorneqartarnissaat tamatta isumaqatigigipput qularnanngilluinnarpoq, allaalluunnit neriutiginaraluarluni napparsimasunik katsorsagassanik utaqqisoqartariaqanngikkaluartoq.

Siunnersuuteqartup tunngavilersutai tassalu nunatta aningaasaqarnikkut ingerlalluarnissaa anguneqassappat taava sulisinnaasut tamarmik atorneqarnissaat anguniartariaqartoq, tassa naatsumik oqaatigalugu napparsimasunik katsorsaanikkut sulisinnaasut inuit amerlanerulernissaat anguniartuartaqarmat

Aammalu Naalakkersuisut akissutaanni taaneqartut iluarisimaarpagut tassalu utaqqisut ikiliartortut neriunniartalu taamatut nalunaaruteqarneq suli ukiuni aggersuni napparsimasut katsorsaneqartussat ikinnerulernerannik kinguneqarluassasoq.

Kiisalu ilaatigut suleriuseq massakkut atorneqartoq assersuutigalugu Qaanaami najugaqaraanni napparsimavik ualikkut matoreernerani napparsimaleraanni toqqaannartumik nakorsiarsinnaannginneq, nakorsiassagaannilu aatsaat Ilulissanut sianeqqaarluni, periarfissiineq tamanna innuttaasunik toqqissisimanarineqanngitsoq aaqqinniaqqullugu Naalakkersuisunut apuukkusupparput.

Ilanngullugu kissaatigissavarput peqqinnissaqarfimmi napparsimasunut sullissinerup suli pitsanngorsartuarnissaa peqqinnissaqarfiup anguniartuassagaa, inuimmi napparsimasut ilaatigut sukumiisumik misissornagit utertinneqartarnerisa kingunerisaasa ilaat napparsimasumut ilaqaatanullu eqqquinerluttarnerat tusartarlugu nuannerpallaarneq ajormat.

Aammalu aningaasartuutit torarfii ilaatigut eqqortumik atortinneqarnersut nakkutigilluarneqarnissaat kissaatigalugu qinnutigaarput, tassami kukkusumik ilaatigut angalatitsisarnerit naammattoorneqallattaasut oqatigigineqartuartarmat.

Taamatut oqaaseqarluta Naalakkersuisut siunnersuuteqartumut akissutaa suliat ingerlareermata taperserparput siunnersuullu itigartillugu.

Hans Enoksen